



**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKI NAČELNIK**

Datum: 21.01.2014. godina

**Premijer  
Zeničko-dobojskog kantona  
g-din Munib Husejnagić**

**Predmet:** Otvoreno pismo,

Poštovani,

Ovo je prvi put da reagujem na ovakav način, premda sam mnogo puta imao potrebu da kažem nešto o ovome. Naime, već je više od 14 mjeseci od kako obavljam dužnost Općinskog načelnika. Čast mi je i ponosam sam što predstavljam općinu Tešanj i sve njene građane. Općina Tešanj danas je po broju stanovnika druga općina u Zeničko-dobojskom kantonu, i ovdje se, uprkos složenim političkim i ekonomskim prilikama u BiH, ostvaruju brojni uspjesi. Posljednje tri godine uzastopno bilježimo rast broja zaposlenih, rast izvoza, rast GDP-a, rast investicija. Mnogo je i drugih značajnih stvari zbog kojih Tešanj može da bude ponosan.

Uvaženi Premijeru, razlog mog javljanja jeste osjećaj da Vi, kao Premijer Zeničko-dobojskog kantona, ignorirate lokalnu samoupravu, odnosno lokalnu vlast. Od implementacije lokalnih izbora iz 2012. godine Premijer našeg kantona (Vi osobno, a i Vaš prethodnik na dužnosti Premijera) nije našao za shodno da posjeti Općinskog načelnika i upravu u Tešnju. Ovo i mogu shvatiti usljed Vaše zauzetosti drugim obavezama (budžetskim deficitom, političkim odnosima u Skupštini ZDK i dr.), ali ne mogu razumjeti da ste do sada bili u niz posjeta prostoru općine Tešanj, a da to ni jednom niste najavili Općini ili Načelniku.

U proteklom vremenu Vi i prethodni Premijer posjećivali ste brojne sportske i kulturne događaje (utakmice, priredbe, doček nove godine...), kao i poslovne subjekte na prostoru općine Tešanj. Vaše pojavljivanje na javnim događajima i u zvaničnim posjetama jest *posjeta Premijera*. Nisam više siguran šta je u svemu tome privatno, šta stranačko, a šta zvanično. Mogu samo naslućivati, kao što mogu nagađati i o tome zbog čega se dolazak Premijera ZDK nikada ne najavljuje u Općinu i zbog čega se taj dolazak organizuje stranačkom komunikacijom...

Bez obzira na činjenicu da se nismo ni upoznali, i da je moguće da u ličnom ili stranačkom pogledu nemamo zajedničke poglede na svijet - slobodan sam da Vas na ovaj način podsjetim da, izbornom voljom građana, ja predstavljam sve građane općine Tešanj, a izborom Skupštine ZDK, Vi građane Zeničko-dobojskog kantona. Smatram da nas to obavezuje da poštujemo institucije - sve dok radimo javne poslove za koje smo dobili povjerenje i preuzeli odgovornost, te Vas, shodno tome, pozivam na viši stepen uvažavanja lokalne samouprave i njenih organa.

S poštovanjem,

Dostavljeno:

1. Premijer ZDK
2. a/a



**OPĆINSKI NAČELNIK**

Mr. Sc. Suad Huskić, profesor